



C.K.N.P PUITUTE



C.K.K.P PUITUTE



LAY LEADERS' TRAINING
TANGGAM PRESBYTERY



A.T.C VALEDICTORY
SERVICE - 2025



LAY LEADERS' TRAINING - LAMKA SOUTH & LAMKA NORTH

To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



ESTD. MARCH 2008

APRIL 2025

Hinna Vâk

AN ORGAN OF THE TANGPHAI PRESBYTERIAN CHURCH



JESU HI LAL A HI TAK TAK NÂ'M?

- Lal Jesu Thumatna leh Kipiakzawna
- Kraws Pathian Thilhitheina
- A Thokit Tai



EDITORIAL | SERMON | KOCHUAM HUANG | REPORTS | SÛNNA ETC.

Editor : Rev. Kamkhotinthang Neihzial,
Executive Secretary

Joint Editors : Rev. C. Lalremruata, Consultant
: Rev. Luttinlel
: Rev. Khaisonhang Vaiphei
: Upa Thualkholian
: Upa Nengsuanhang
: Pi Neikhovak, Secretary, CKNP
: Tv. Lianmuanhang, Secretary, CKKP

Business Manager : Tual Upa, Langlalthamuan
TPC Office D. Phailian
P.O. Box 107 CCPur-795128 Manipur
Phone No. +91 9958160325
Email - ehinnavak@gmail.com

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. EDITORIAL	01
2. KOCHUAM HUANG	02
3. JESU HI LAL A HI TAK TAK NA'M?	04
4. LAL JESU THUMATNA LEH KIPAKZAWNA	08
5. KRAWS PATHIAN THILHITHEINA	11
6. A THOKIT TAI	19
7. GITLO A DING AH KITHAWINA NGAITALO	22
8. JESU BARABBA A HEM A HILO LEH JESU MESSIAH?	25
9. REVIVAL MEET DETAIL PROGRAMME	30
10. KNP HUANG	31
11. KKP HUANG	33
12. SUNNA	38

SYNOD PUIPATE

Moderator : Rev. Vanlalchhuanga
Secretaries : Rev. Andrew LR Khiangte (Sr.)
: Rev. Summinlian (Jr.)
Finance Officer : Upa Tinliankham
Statistician : Rev. Thianganlim
Executive Secretary : Rev. Kamkhotinthang Neihzial
Consultant : Rev. C. Lalremruata

Hinna Vâk ah thu kisua zosia hi Editor ngaidan a hi suak puai

Pauchapna Thupi:



1. Palm Sunday, Good Friday leh Easter Sunday-te hi kitup tak ah Kochuam tin in Thagau lam malzawlina tamtak tawh i mat chiat theina ding in dawn hitiu.
2. Pastor Bial Kikhawmpi Thagau lam malzawlina tawh buaina umlo ah i mat chiat theina ding un dawn hitiu.
3. Kochuam in maban ah Programme tamtak i neiteu hi buaina bangma umlo a, Taksa leh Thagau ah lawting tak ah mat a hi theina ding in dawn hitiu.
4. I Nam puitute (VPC, YVA, Zillai, VWA) â ding in pauchap hitiu.
5. Gamsung buaina ziaak ah panlatu pawl chuam chuam ah puitute a ding in pauchap hitiu.

PHUT UM LO NGAIDAMNA

“He Pa amau hi ngaidam in, a thilhiu a het lo ziak a hi” (Luka 23:34)

Hinna Vâk Simtu Dawitakte leh ngainatute zosiate la bawn un Good Friday Chibai ka hun bûk hi.

Tuchung **Hinna Vâk** ah hin Palm Sunday, Good Friday leh Easter Sermon te sim thei ding in i um ua kipak a um tak zet hi. Zia sermon te haw chu i sim zing lai un Kraws chung ah Jesu kamsuak masapen, Ngidamna thu ngaitua zui leu hin ka nuam hi.

Australian Missionary Graham Stuart Staines chu a chapa pani, Philip (kum 10) leh Timothy (kum 8) te tawh Hindu kulmut Bajrang Dal kiti pawlte malakna’n 23 January 1999 ni’n a chuannau Car sung in hepina neilo kei in a hallum ui. Maleh, a jinu Gladys Staines chun a pawsal leh a chapa thattute chu bangma phut nei keilo in, “Ka ngaidam hi,” a ti.

India Prime Minsiter lui, Rajiv Gandhi chu Tamil Nadu mun ah 21 May 1991 ni’n suicide bombing mang in a that ui. Zia lemguattu chu Nalini Riharan, Tamil numei, Sri Lanka ah um a hi. Supreme Court in Rajiv Gandhi thattute a thadawk hun in Congress Party le a seppiteu in lungawilo thu a tangkopi lai un, a jinu Sonia Gandhi, a chanu Priyakna Rahul leh a chapa Rahul Gandhi te chun a pau thattute chu, “Ka ngaidam ui” tin thusua a bawl ui.

Kum 2006 ah khan Muolvaiphei khua ah um unau pawsal pani (2), Paula leh Ngaia te chu Imphal zuan ah a chia lai un vangsiat um tak in Nambol mun ah Police te Gari tawh kiphutua in a mun ah a thi gêl ui. A piannapa, Presbyterian Upa Lalthankhuma chun phut bangma nei keilo lo in, “Ka ngaidam hi” a ti tawp mai hi. A khukhial Police-te hung in a thipa Jinu chu sepna tiang piak a tiam thu a hun gen ua, a sungkhat laina leh vaihawmtute chun le zia chu chiapi mai di pha a sak lai un, “Khutkhialte ka ngaidam ei tai” tiin thuma-thunung um talo in a kicham mai ui.

Pastor Praveen Kumar chu 25 March, 2025 ni’n Andra Pradesh state ah migilote khut in a thi. A vuina hun vaiguan ah chun a jinu chun, “Khrista’n Chamna leh muanna tangkopi di ei ti a hi. Tun i ah hin phuba la ding ah hung khawm ihiu puau. Pathian lalgam genzak di leh i chungua thilhihikialte ngaidam di i hi jawu” a ti.

Ngaidamna hi a man piak di a tam na mai zen e! I chung ua thil sukhialte’n thingpi a hung khai ua, Puandum tawh Gan thisan sua ah ankuang a hung siam nung ua Ngaidam chu Ngaidamna ting a hi na diam?

A chung ah “Ka ngaidam hi” titu hin thina tuntú tēn ngaidamna a channa dingun phut thuk bangma a nei puau. Dan dungzui ah gawtna a tuaku tilo chu. Good Friday mangzing tute, Lalpa Jesu ah gitlona ngaidamana changtute hin i chungua thil sukhialtute ngaidam a hi theina ding un phūt i nei kha em? Ngaidamna chun thil phut bangma a nei lo di a hi. Kingaidamtuana ding ah i thil chiapi danteu hi kisui thak kit hitiu.

Tuchung Good Friday i matnau ah hin Lal Jesu ngaidam theina entawn hitiu. Mawna nei keilo, migilo gual ah thina tiang tuak ding ah gawttu te, “Hepa a mau hi ngaidam in” a ti thei nalai a hi kha.

Lal Jesu’n ama sugenthei leh ama thattute bawn ngaidam zo a, i chungua thil bawl khial ngaidam zaw lo di i neiu em?

Lalpa’n simtute zosia malzawl chiat ta hen!



Kochuam Huang

KNP Kikhawmpi Lian

Kochuam Numei Pawl Kikhawmpi Lian 14-veina chu Mata Pastor Bial in Lingsiphai Kochuam Biak-In ah Ni 28 February 2025 ah kipat in Ni 2 March 2025 sung in a zintun hi. Thagau lam thupi “Puakgik kidawntua hitiu” (Gal. 6:2) mang in mat a hi. Pathian Biakna Kikhawp, Palai lawpna leh Reports, Seminar, Lapawl Kidemna, Vaihawmna leh Kitêlna-te Taksa leh Thagau ah lawting tak in matzaw a hi.

KKP Vaihawm Kikhawp

Khristian Khanglai Pawl Vaihawm Kikhawp 8-veina chu Panglian Pastor Bial in Panglian Kochuam Biak-In ah Ni 7-9 March 2025 sung in a zintun hi. Thagau lam thupi “Pathian nai un” (Jakob 4:8) mang

in mat a hi. Pathian Biak Kikhawp, Palai lawp leh Reports, Vaihawm, Seminar leh Kipawllimnate in Programme Taksa leh Thagau ah lawting tak ah matzaw a hi.

Pro. Pastor Orientation

Pro. Pastor Orientation Programme chu Ni 11-12 March 2025 sung in Committee Room, Office ah nei a hi. Orientation Programme sung a hin Resource Person hotu suan um tak tak pasagi (7) ah kipat in thupi chuam chuam mangchan hun mat a hi.

Lay Leaders’ Training

Synod Executive Committee 14:12 dt. 4.4.2025 chun i Synod huap sung ah Kochuam Upa thak, Training a lah pang kha nailote â ding bîk ah Lay Leaders’ Training a guanggal chu Ni 14 March 2025 in Munpi Kochuam Biak-In ah Tanggam Presbytery huap sung ah Training neipi ahiu a, Ni 21 March

HINNA VÂK

2025 in Hill-Town Kochuam Biak-In ah Lamka South leh Lamka North huap sung ah Training neipi kit a hi.

RMHS Office Assistant lak thu

Synod Service Board 12:4 dt. 18.3.2025 chun Rostad Memorial High School ah Contract Basis ah Office Assistant nâ sem ding in Pu Genminthang, Mata Vengpi Kochuam chu a la thak hi.

ATC Valedictory Service 2025

Aizawl Theological College (ATC) chun Ni 19 March 2025 ni'n Valedictory Service hun a lah mang ah, zia hun ah hin Rev. C. Lalnghakliana, Mizoram Synod in Valedictory Address a gen ah, Principal in Zillai pawtdawk 78 te chu Pathian kiang ah latdawna a nei hi. Tangphai Provisional Synod inle Pathian malzawl na dawng in Zillai pathum (3) pawtdawk (zilzo) i nei ui. Amaute chu-

- 1) Rev. Siamlaron Neihsial, Master of Theology (M.Th.), Leijangphai Kochuam
- 2) Mr. S. Paukhanlal Vaiphei, Bachelor of Divinity (BD), Jubilee Kochuam
- 3) Mr. Thanglalzo Vaiphei, Bachelor of Divinity (BD), Lingsiphai Kochuam

Lay Workers' Retreat

Officer's Meeting 40:16 dt. 18.3.2025 chun i Synod huap sung ah Lay Worker zosiate Retreat Programme 2025 nei di lem a sak dungzui in a hung tung ding Ni 30 March 2025 leh Ni 1 April 2025 nite ahin Retreat Programme chu guanggal a hi. Zia hunsung ah hin Office kikhak di a hi.

Sunday School Training

Officer's Meeting 14:3(4) dt. 18.3.2025 chun a hung tung ding Ni 1-2 May, 2025 ahin i Synod huap ah Sunday School Training nei ding vaiguan a siam ah, training hun sung ah hin hotu suan um tak takte ah kipat in Thupi pawimaw tak tak zilkhawmna um di a hi. Chuleh, Training hi Pastor Bial tin ah kipat mi pani chiat pan thei hi di a hi.

Revival Meet

Synod Executive Committee 14:14 leh Synod Revival Committee 6:3 dt. 14.2.2025 chun Tangphai Provisional Synod huap ah Revival Meet Ni 23-25 May 2025 sung in Hill-Town Kochuam Biak-In mun ah mat ding in guanggalna a siam hi. Meet hun sung ah Thagau lam thupi ding in "Hung tho dawak in: (Isai 52:1) têt a hia, Speaker ding in Rev. C. Lalremruata, Consultant guat a hi.

Detail Programme chu pêk 30 na mu thei ina.

JESU HI LAL A HI TAK TAK NA'M?

(Luka 19:28-40, Thupuan 20:11-15)

~ Rev. K. Jama Vaiphei
S. Munnuam

Jesu chu Lal/Leng (King) a hi tak tak hi ti chu i pawm chiat diu ginchâk a um hi. Ahin, Lal a hi leh bangtia Kraws ah migilo tualthat gual ah khetdên ah um ziang maw leh? ti'n min ei dawng chiltên leh i dawnhu dânu kibanglo sau sau maithei a hi.

Jesu chu hukdampa tina a hi ti i he chiatua, Khrist chu sathaunu, guatchuam tina a hi ti i hiatsau a hi.

Jesu Lal a hi ti chu Thuthung Lui ah Jawlnei Isai, Danial, Zechariah leh Sambu vêl ah le a kigênna i muu. Isai 9:6-7 ah hin chamna Lal chapa a thuneina (power) le khang zêl di ti a hi. Zechariah 9:9 na chun,

1. Entia la Lal a hung hi.
2. Gâl zotu leh hât chu ama a hi.
3. Kingaitawm tak in Sabiltung no chung ah

chuang in a, a hung hi, ti in a gên hi.

Matthai 2:2 na chun le “Khawi a h’em Judate lengpa hung piang chu? ti in mipilte khan Jerusalem ah Herod In in a va hâwlu a hi kha.

Mithiamte chun jawlneite’n a thil mu dânu hi “gamla tak ah tâng sâng um, a phâkma tâng niam haw tawh i mu dên vek ziang gual ah a muu a hi” a tiu. Zia umzia chu nâideu ah tung pai di leh sâwtpi nung ah hung tung kit di hawle khat vei thu a mukhawmu a hi. Etsakna’n

HINNA VÂK

Danial thilmu lawk lak ah Grik
lal gam um didân a mu le a
guitung zo ta, Grikte bep hilo
in, amau nung ah le Romte
hung lal kit zo ta, Romte
nung ah le Britishte hung lal
kit zaw nung khawvêl ah um i
hi tau. A chuti zing lai a chun
Danial leh jawlnei dangte'n a
muu guitung nailo tamtak a
um nalai hi.

1. Leng di gual ah kigên lâwk hilehle leng hi nailo

Zia khawvêl ah a hung
masak a khan leng lopi leh
thunei tak ah hunglo in a
mi siamsa ei haw mêlpu'n,
niam tak in a hung hi.
Matthai 1:21 na “chapa
hing intin, a min chu Jesu
la sak di a hi; ama chun
a mite a gitlonau apat
hukdawk ding a hi ngal
in” ti a hi gual in mitamtak
dikna lampi'n a pui a hi.
Tuhun ah ei haw khang
tiang in Jesu ginna zia
ah i gitlonau ngaidam ah
um in, thiam chansak in i
um tau a hi. Zia umzia chu
Matthai 9:1-3 sung ah hin

a hung masak ah mihing
hinkhua a suk danglam
bep hilo ah, a tual lènna
gam di Jordan naklam
Zebulun leh Naptali gam
- Nazareth, Kapernaum
khuate chu malai in mun
giauchau himaleu, Lal
Jesu a gamua a la tuallên
ziak in mun pawimaw leh
lûntak a hi tak ziaku'n Isai
9:1 na chun a hung dik
a, châng 2 na “thimnuai
ah chute chu salvâk a
hung hieu, zia chun ei haw
gam le ei salvâk pek ta'i”.
Himaleh, châng 6-7 na
kigênte chu khawvêl leng
gam tun dân in a tung kim
nai pua'i. A hung masak
a khan “Hepina nasep”
chi chuam chuam mang
in gam a lai. “A Lalgam
(Kingdom) chu - tu hun
leh tunung ah tung nalai
di a hi. Tu hun ah a Lalgam
lûtna di chu ama, Pathian
chapa, Jesu Khrist ah
ginna zia ah um a hi, t'n
Billy Graham Evangelistic
Association te sua New
Compact Bible Dictionary

ah Jesu chanchin a gënna chun a gën hi. A Lalgam nunung zaw chu thunei tak leh thil hithei tak ah a hung phât leh hawn hi ding a hi” ti’n le a kizik hi.

Mipilte thilpiak pani - Murrah leh Begaw - thawkna leh kithawina etsakna gual in - a hung masak ah thawkna leh hepina a tundaw Leng gam chu tulai khawvêl ah gingtute zosia lungthim hi a hi mai hi. Gendan chuam in gen len, Khristiante chënna mun leh gam zosia chu Jesu Khrista Lalgam chikhat a himai hi.

2. Thunei tak leh thil hithei tak ah vêl hung (hung kit) di a hi

1 Thessalonika bung 4na ah Paul in a gën gual ah rapture a hung di chun khawvêl hung phalo ma leh a niveina khawvêl a hung kit phât leh leng lopitak ah hung di a hi. Amasa sabiltung no chung ah kingâitâwm tak cha

hung pa chu (Marka 11:1-11) sakawl vâm chung ah chuang in, a mitte chu meikuang gual hi’ntin, a luchang in Lallukhuk tamtak khuk pum in thisan ah kidia puan in kithuam in a. Vân sepaite chun puan malngât vâm sil in, sakawl kâng chung ah chuang chiat in ama chu zui in au. A kam ah kipat in chemsau hiamtak pawt in a (Tpn 19:11-15). A vaihawm didan chu thîk tiang ah vaihawm di a hi. Thiampu Lal In sung ah luang kang ah a zep pau khan namtin chung ah thîk tiang vaihawm di a ta’i. Pilat ma âng ah panpitu neilo leh liangvai tak ah ding pa kha lalchutpha vâm chung ah kichû’n, mithi hung tho dawkte chung in vaihawm ta’na (Tpn 20:11-15). A puan chung leh malpi chung ah a min kizik di chu “Lalte Lal leh Hotute Hotu” ti hi di a hi. Jesu chu leng khat a hi pua, lengpa a hi.

HINNA VÂK

Leng tampi lak ah khat a hi pua, ama chu Lengpa chu a hi. Ama bep chu “Lengte Leng, Lalte Lal” ti min chu Bible in nivei sêl piak a hi (Tpn 17:14, 19:16) (en.wikipedia.org). Zia gual tuk ah leng lopi hung kilang nailo chu zuitute i hi ziaku’n tu hun in guallel tak gual in um maleu hin ama tawh vaihawm khawm di i hui. Zia thugen hi a dik a hi. “A thina i thiuh chun, a hinna chun hing khawm hi tiu. I thawku chun, ama tawh vaihawm khawm hitiu; ama i kilepsanu chun ama’n le ei kilepsan in a (2 Tim. 2:11-12). Zia chu

i thuginu 10 na ah **“Ni nunung ah chun mithite chu kaithaw in um intin uh, mizosia Khrista vaihawmna lalchutphama âng ah kilang intin uh, zia damsung ah a thil hi siat leh hi phat gual zel un thutan piak hin’au. Ginglote leh migilote chun thiamlo chang in a gitlo uh gawtna tuak intin uh; Khrista ging ah, a thu zawmtechu vang a langchang ah thiam chansak in um intin uh, lopina ah lawplut in um inau”** kigên a guitunna hi ta’na.

Lalpa’n a thu malsawm ta hen!

“La phatnate leh chanvate chu kisanpi a, la chapopi lona ding in kiving inla; Jesu Khrista leh a hâtna bep chu ngaitua zing inla, kisanpi zing zaw’n; Zia bep chu la kipuklona ding ah la kiven theina umsun a hi ngal a”

— Charles Spurgeon

LAL JESU THUMATNA LEH KIPIAKZAWNA

(Matthai 26:36-46, Phil. 2:5-8, Heb. 5:7-10)

~ Rev. S. Genlianpau
i/c Munpi Pastor Bial

Damlai khawvel hinkhua hin thilpha leh phalo, kipakna leh daumna palto zel ah hinkhua tawp tung di chu ihu. Khawvel gitlo silthiang ding in taksa'n vâng thakai ngawi ngawi in damlai ni a mang hi. Thagau ah vang lei mite silthiang di leh gitlona tan dawktu ding in haksatna leh musitna a thuak a hi. Lal Jesu thumatna leh kipiak zawna hi nguntak in ngaitua hitiu.

THUMATNA: Thumatna kiti hi a gen bailam ah, a zui vang a hak hi. La Nu leh Pa thu mang in chutileh la dam kum sawt di a hi (Eph. 6:1) ti'n Sawlchak Paul chun a la gen hi. Chun, Pathian in khawvel a hepi mama zia in a chapa Jesu Khrista a hun pia'i. Ama gingcha zosia chun kumtuang hinna nei inau (Johan 3:16). Ama Jesu chun Pa thupiak mang in liangvai leh lungngai tak in damlai khawvel chu a la mang tai. Jesu'n thumang tak ah a nasep lai in, panpitu

di neilo maleh ama Jesu liangvaite panpi, damlote sukdam, mihing gitlona zia ah thi dite thasang ah Kraws chung ah thi a hi. Lalpa Jesu huntawp lam in nungzuite tawh hiatzingna ankuang a siam ah zia chu taksa leh thisan ah ka tatsa la hui hi hun hemillo a midangte panpi leh sukdam nasep sem din a tiam a hi. Lalpa'n Gethsemane huan ah pauchap din nungzui thum te a ko chuam ah, nangu zia hin um unla, kei zia a pheu deu khun va pauchap

HINNA VÂK

ka atia, lungngai leh thavai tak in Pa kiang thumvei hial a pauchap hi. *“Hepa a hithei chun zia No hi ei pêlsak ham in, a hinla keima thu hilo in nangma thu thu hihen”* ti in a dawn hi. Pa thu a mat dan, nangma thu thu hihen ti ah a dawnhuna hi lunggil ah tepte tâk leh hiatmil lo chu gingtute mawpuakna liantak a hi.

KIPIAKZAWNA: Lalpa Jesu kipiakna hi lunggil tak in ngaitua thak hitiu. Manipur buaina’ Meiteite’n hepi neilo kei ah sawisak thingtangmi tangval khat chun thuak zo talo in Volunteer in a hung kipe dawk hi. Ama chu insungmite ngainalo a hipuai. Government sepna muthak liklek a hi. Zia a ngainat insung mite leh a sepna chu nusia in a thi inle mipite â ding in kakipe tai, a ti a hi. Gingtu masa Stephen chun Khrista sepbâk sepna’n ginglote suang ah selup a hi di kuan in *“Lalpa a gitlonau hi phuba la kin”* ti pum in thitiang in Khrista â din a kipe dawk hi. Mosi’n Israel te’n Pathian

taisan in milim pathian a biaku a het in a lungna mama ah, Pathian in zia hunlai tak chun Mosi kiang in thu a gen ta, Israel mipite hisumangthai ingkatin, a thasang ding un amau zat ma mi ka hung pe mai diam? ti ah Mosi kiang ah a genlai in Mosi chun, *“Lalpa zia ka mipite gitlona la ngaidam zawlo di ahi chun, Hinnabu ah ka min kha thaimang zaw mai tan”* (Pdt 32:31-32) ti’n Pathian kiang in a mipite sukmanthai ah a umlona ding un a kipedawk hi. Chun, Lalpa Jesu ngei inle Judate’n Kraws ah a khetden hun un, *“Hepa ngaidam in, a hiatthiamlo zia uh a hi”* (Luk 23:24) ti’n a dawtpiak hi. Zia gual ahin thitiang in Lalpa â ding in kipedawk ding in Lal Jesu’n ei chial hi. La phuaktu chun lungsiat tak in ko in a ngak hi, ngaipha tiam in kona aw chu ti in a gen hi.

LAL JESU A LUNGNGAI THEI: Pathian chapa Jesu hi mihing a hi’n, lungngai leh thachawl thei a hi. Mihing diktak a hi’n, Pathian diktak

a hi kit hi. Jerusalem Zion pindan sung in, Lalpa Jesu'n a thisan a hawm hi. Hithei ham leh a maban ah thiltuak di hi pumpel thei a nuam hi. Mihing hindan in chu a huphul hi. Zia gual ah huphul tak ah khawvel damlai hun hi chu mat a nuam puai, a thavai ngawi ngawi in a liangvai takzet a hi. Maleh, Pa thutiam pelsan thei ahi pua, lungngai leh liangvai tak, thumang tak in a malam a zuan zel tai. A nungzuite kiang in, *"En un a hun hung tung ding eitai, mihing chapa hi migilote khut ah mat ah um ding ahi tai. Tho un, chia hitiu, en tiam un ei matsak ding pa chu a hung nai mama tai"* a tia (Mat 20:45,46). Lal Jesu lungngai leh liangvai tak kawm ah kraws a puak lai in numeite'n a kau chu a hia, bang ding ah ei ka la hui em, nangleh la insungmite â ding un kap zaw tau in a ti a hi. Zia ah kipat hin, Jesu lungngaina

leh liangvaina hin zia hi ka thawk di ahi'n ka nung ah gingtu ginumte chun hung thuak di ahiu ti hi ei zilsak leh zilti a hi ti a hiat thei hi. Tuni hin nang leh la inkuan ten Lal Jesu liangvai leh lungkham na hin bang gual in la kisiam fel tam? La phuaktu chun, kisikte lungmuanna la hi, gentheite kipakna, gintawmte haw chung ah la phai, nang hawlte chung ah le. Jesu lungngaina hi kipakna chansak hi gingtute mawpuak a hi ti hia'n damlai khawvel ah i châmsung un, thutak lampi zui ah a selai siamphatu hi guachiat in lunggil tak in Lalpa na sêm hitiu.

Thumatna leh Kipiakzawna zia in khawvel ngui leh chau tha ziang ta chu Lal Jesu zal ah suk hal in i um tau a hi. Lungngai leh liangvai hun in Jesu thamuanna ei nutsia piak Thagau Thiangtho chun ei chenchil in ei thamuan zing ta a hi.

KRAWS PATHIAN THIL HITHEINA

~ Rev. Thianginlim Vaiphei
i/c S. Munnuam Pastor Bial

Dan Lekhabu 21:23 “a luang chu thinglêk ah zankhua’n la kawi den lo ding uh ahi; khailup ahi ni ma ma ah chun vui ding ahi, thing ah khailup ah um taphot chu Pathian hânsia dong ahi ngal ah. La lua ding ua Lalpa la Pathian un a hun piakna gam chu la hi’buak lo ding uh a hi.”

Ephesa 2:13 - 16, Tu’hin vang, Khrista Jesu ah chun, nanghaw malai ah gamla tak ah umte chu, Khrista thisan ah chun hi’nai in la hung um tau hi. Ama chu i kichamnau ahi’n, pawl nite chu pumkhat ah siam in, i kikâl ua dâidanna bâng chu a suchim ta a hi. Pani hilai kha ama ah mihing thak pakhat hiding ah a siamdaw theina ding in, dan leh a thupiakte leh a thuthungte chu subei in, kichamna a bawl tai; kraws zal ah panite chu kipumkhat ah, Pathian ah a kicham theina ding un, kituak lona zosia chu a that ta a hi.

A masa’n tuchung Hinna Vâk ah sua ding thupi “Kraws Pathian thil hitheina” ti thupi zik thei ding ah ei dawisaktute chung ah leh Pathian chung in kipâk thu ka gên masa a hi.

Zia thupi sim zosiate thokit Lal Jesu min in chibai ka hun buk a hi.

Kraws Pathian thilhitheina thupi mang ah holim di i hi zia in 1 Korinth 1:18 na thu hi gên masaklo theilo hi in ka ngâi ah, kraws thu chu mangthaite â ding in ngawluhai a hin, ei haw hukdam hi zingte â ding in vâng Pathian thilhitheina a hi zaw’i, a tia. Jesu, Pathian

chapa khan kraws chung
ah khan bangma hitheina
neilo gual ah a thuak khan
khawvêl mite nuisan,
simmaw leh tawdên a tuak
ah, zia a kingaitawmna leh a
thilhitheilona khan lei leh vân
a kicham sak thu a kimu a hi.
Zia a nuai ah gual a hi vak
holim hitiu.

1. Mihing gitlo man Jesu'n Kraws a pia'i

Johan 3:14-17 ah chun,
Pathian in khawvêl a hepi
ma ma ah, chutichun, a
chapa changkhat neisun
a hun pe ta, kuale ama
gingtapo chu mangthailo
ah, kumtuang ah hinna a
nei zawkna dingun, ti in.

Himalehle, Pathian
chun a mi hepina chu
pachat tak in a latsak ah,
migilo i hi laiua Khrista i
thasângua a thi ziaak khan
(Rom 5:8).

Chutichun, miphakhat
ziak in gitlona khawvêl hin
a lut ta'n, gitlona ziaak in
thina ah lut in, zia gual ma
chun mizosia migilo i hi tâk

ziaku'n thinân mizosia a
zen suak ta'i.

Mi pakhat ziaak in
'sual' khawvêl ah a hung
lut ah, 'sual' ziaak in thina
a hung lut kit ah, zia 'sual'
hi hung kihing sawn zel in,
'sual a piang ah, sual a hing
ah' Adam ah i pianna pau
a hung hing ta'i. Tichun,
sual chu Khrista thisan ah
a tatsak ah, sual chu Kraws
ah a dit sak ta a hi.

Paul lekthawt ah
kipat hin, Khrista kraws
chu a thûkzia, a lopi zia
leh a thil hithei ziate i mu'
Jesu Khrista zal ah hukdam
i hung hinateu, go lua ding
ah cha sak ah i hung um
ziate chu mu in Pathian pâk
ah chawihawi ah limtak ah
i um dingun hi gingtute'n i
bâwl dingun a hi. Zia bân ah
chun Khrista'n kraws ah a
thuakna umzia, Pathian
chate di'n, Pathian tawh
i kimutuana mai di hilo in
Kraws chun i sualnateu
ngei chu suk mangthai a
hina mun leh i thuakpi a
hi zia a hiatsak a hi (Rom

HINNA VÂK

6:6). Zia bep chu hilo in, zia kraws kikawppina bep hin nitin hindan hi umzia a nei sak thei a hi. Haksatna leh nasepna ah le kraws nasep zêl a hi di zia a hiatsak a hi (2 Kor. 4:4-12). Chutichun, Paul lekhathawtte hi mihing gitlo mante Jesu Khrista'n kraws ah a thisan in ei hun chaw dawk a hi. Zia zia chun, eiu gingtute hi Jesu Khrista thisan man i hui a hi. Khawvêl ah hin thisan man a hi lam kihelo mi a tam khawp mai hi. Paul lekhathawtte kila mang ta leh, Lal Jesu thisan kraws chung ah luang kha a lulna leh a lopinate hi i hiat di bang tak in kihe pua'na.

2. Kraws thilhitheina chun ei zalensak ta'i

Kraws, Pathian thil hitheina ti hi thupi langsal tak a hia, mi tam tak in a gên tau ah, gendan chuam chuam le um thei in ah. Bible pansan in gen hitiu.

Luka 23:39-49 hi thu ngainawp mak tak khat chu a hi. A makna pen chu

Jesu leh mi gilo dang pani, Kraws ah khetdên chanchin a hia, a ngainawpna diak chu zia thu mak tak kâl ah hin mi pakhat in hukdamna a chang a hi. Jesu thi dâkkâl ngêi ah leh ama zia ah kumtuang hinna dawngtute chanchin i muu hi a lopi danglam diakna chu a hi.

Jesu chu mi gilo pani kikal ah a khêndênu, ama suk mualpho diakna'n mi gilote kikâl ah hin a khedenu, mi gilote lak ah pakhat zawk chun Jesu chu a la vau zui kit nalai ah, "Khrista chu hilo la h'em? Kisudam in la, keiu teni le ei sudam ta'n la," ti in. A lâwipa'n a hi leh chu ama chu a zilngai zawta, "Pathian la lau paw maw? Kibang tak ah gâwt ah i um hi. Ei hi vâng i chan di him a hin, i thil hi man chu i mu a hi; ama hin vâng bangma a hi khial pua'i," a tia. Zia zaw chun Jesu lam nga'n a kiang ah, "Jesu, la gam la tun tak leh ei he zing in

aw,” a tia, Jesu’n a kiang in, tuni hin paradis ah ka kiang ah um di la hi a tia.

Jesu chun kraws ah khetdên a hi tâk nung ah le ngaidamna thu a la gên dawk zui nalai zel a, zia suammang pakhat zawk hi a ngaidama hi. Tuanthulam ah chun zia suammang min hi Dimas leh Mumachus a h’em hi in gen a hi. A gen sek danua chun Josephte nupan in nausen Jesu a zammangpi laiua khan zia suammang panite hi a kituakpiu ah. Dimas lawipa chun khawsak michingte’n nausen chibai bukna a piak kha lakpiak a nuam ah; maleh, Dimas hin a lemsakpi pua, a kinutsia di kuanua chun Dimas chun nausen Jesu kiang ah chun, “Bang tik ni a h’em, lei lungsiatna di hun a hung tung mai thei ah, zia hun ah chun tu hun hi la hun het zing di a hi” ti in a gen hi a tiu ah. Tu chung ah hin Jesu’n lungsiatna a lat sak kit hun a hung tung ta le a

hi maithei hi.

Jesu’n migilo pakhat kiang ah chun, “Tuni ah ka kiang ah paradis ah um in la” a tia. Paradis ti paukam hi Persian pau ah kipat ah lâk a hia, a umzia chu ‘Huan hawi’ tina a hi. Persia lalte chun huan hawi tak ah chun zinphate chu a lênpi seku’i. Zia gual ah huan hawitak chu vângam tekhinna ding ah a mang zui tau a hi. Jesu kiang ah khetden migilo pakhat chu Jesu’n zinpha ding ah a pawm ta a hi. Zia migilo chu dinmun lopi tak a chang ta a hi. Zia tak ah pat mai hin le kraws chu Pathian thilhitheina a hi zia a hung lang ta a hi. Jesu kiang zuan ding hin vâigei talua a um theilo ti a het thei kit hi.

Jesu kha zinglam dâk 9:00 vêl ah a khendenua, an nek hun vêl ah kipat chun khua a hung thim suak hi. Ni vâk a bei tai, ti in Bible in ei hil hi. Khawvêl in Jesu a sôn a, ni’n le vâk

HINNA VÂK

a sua nuam diak talo a hi.
Chuti laitak chun thilmak
danglam tak a hung tung
ah, Jerusalem temple
puanzak chu chunglam ah
pat in a nuailam tiang in a
hung kithêk suk ta a hi.

Zia puanzak hi
mun thiangtho leh mun
thiangtho pên dâidanna
puanzak a hi. Mun
thiangtho pên ah hin
thiampu lalpên chu kum
khat ah ni khat bep lut hun
a nei a, zia chu Tatna Ni a
hi. Zia ni ah chun thiampu
lalpên chun mipite gitlo
kithawina di thisan a châwi
ah, mun thiangthopen chu
a va the sek ah, mipite
gitlona chu khumang in a
um ta sek hi. Kumlui lam
ah a gitlona zosia a pat in
ngaidamna a chang tau
a hi. A kum kit Tatna Ni
ah zia gual ma chun gitlo
tasate tawh sukthian ding
in thiampu lalpên chun a
bawl dan pangai gual in a
bawl kit sek a hi. Zia gual
chu Jerusalem temple
siatma cheng a bâwl dânu

a hi.

Bang zia a h'ém Jerusalem
Temple puanzak chu a hung
kithêk? Jesu thi masang zosia
khan chu gitlo ngaidamna
ding in kuama mimal in
Pathian a ho thei puau ah;
thiampu lalpên haw malam
in a kihothei bep sek a. Kraws
ah Jesu thi ah kipat a hileh chu
mi kua'n le Pathian a ho thei
ta'i ti etsakna ding in Temple
puanzak chu a hung kithêk
ta a hi. Zia hi mitin in kraws
ah Jesu thilhitheina a hi zia
suklatna ding ah pawimaw
tak pakhat a hikit hi.

Jesu chu zia hunlai ah chun
ngai tak in a kiko ah. Jesu
kiko thu hi Chanchinpha ziktu
pathum in a gen chiatua,
Johan gendan chun Jesu
thugen nunung pen chu
“A kichai ta'i” ti a hi. Zia
paumal chawmcha hi sut
chian pawimaw tak a hi. Jesu
thugen hi thi di lauthawng
aw a hi pua, zawna kiko
aw a hi zaw'i. Pawsal pha
hangsan gam pâwt lawting
tak ah a hung kile kit chun
khawmual ah hanlâ a sam

sek a hi. Pathian pawsal pha, khawvêl ah hung gam pâwt in le a bawl di zosia a bawl zaw tâk nung ah Jerusalem khawmual ah, Kalvari tâng ah zawna hânla a sâm ta a hi. A kiang nai ah mite chun thi di lauthawng kiko aw hi in a ginchau a. Maleh, pawsal pha lawting hânla a hi zaw'i.

Jesu hânla sap ah kipat in hukdamna chu sep zaw a hi ta'i ti a hiat thei hi. Bangkim siamfel kei a hi ta'i. Mihingte di'n thil dang dang bawl kit di a um ta pua'i. Pathian pawsal pha gam pâwt thil hun puak chu kipâk tak ah pawm mai di a hi. Kraws a tun ma in Jesu'n "A kichai ta'i" a la ti ngai pua'i. Kraws a tun nung ah chun Kalvari hânla a sâm thei ta a hi. Hukdamna chu sep zaw a hi ta'i ti a puang ah, zia hin kraws chu Pathian thilhitheina a hi zia a latsak kit ngâl a hi.

Zia gual ah ngai tak ah a kiko nung ah chun Jesu chu thamuang tak in a thi ta a hi. A thi kuan ah a kamsuak nunung pen chu, "Hepa, la

khut in ka thagau ka vawp sak hi" ti hi a hi. Zia hi pauchapna thu a hia, Sam 31:5 thu a hun mang mai a hi. Juda numeite chun a chateu pauchap dân di a zilti masak penu chu zia thu hi a hi. Imut kuan ah pauchapna'n a mang seku'i. Mari'n le Jesu naupan lai in zia pauchapna thu hi a la zilti ta ngei in ah. Kraws lêl ah a um nung ah Jesu'n a pauchapna nunungpen â di'n, a naupan lai ah a nu'n a zilti kha a mang kit ta a hi. Chuti gual ah a pauchap zaw nung chun thamuan tak in a thagau a tha ta'i. Zia hin le kraws chu Pathian thilhitheina a hi zia a latsak kitna a hi. Kraws kha Pathian nêuna/lelna hi hen la hile chu, Jesu khan thamuang tak in a thagau tha thei diak pua'na.

Thil dang mak tak pakhat a hung tung kit ah. Jesu'n thamuang tak ah a thagau a tha lâi chu sepai za hotu in a mu, chun, "Zia mi hi mi fel tak a hi phawt mai" ti in Pathian a pâk ta a hi. Jesu khêndêntute lak ah hotupa pen inle Kraws

HINNA VĂK

ah Pathian thilhitheina hung lang chu a dawng ah, Pathian pāk in a kiko ta hial a hi. Tulai pau in gen di hita leh a piangthak kiti ngēi in ah. Rom sepai zahotute chu piangthak thei a kilawm le a hilo mai zen tawh! Maleh, kraws ah le Jesu thi a va mu phat chun a thinlung a hun tui tha zo ta. A lopina e!

Paul chanchin lamkai vak en leu hin Paul chu Juda sakhua ah mi phatchuam ngai thei tak a hi. A phatchuam ngai takluat zia ah gingtute a sukgenthei khawlaw hi. Ama hi lekha thiam, mithiam sual kit nalai hi a chim um diak sek a hi. Paul hi le a nawkphak sak um khawp mai. Ama bo chu, kraws ah Pathian thilhitheina a mat nung ah hin chu a chim um zui talo a hi. Ama ngei chun a hi, i thupi kingakna san, “Kraws thu chu mangthaite di’n ngawl na a hin, eiu hukdam zingte di’n Pathian thilhitheina a hi zaw’i” a hun ti ta a hi.

Grik mite chun khawvêl pilna a ngaisangua, a pilnau le

a sâng khawp mai hi. Paul le Grik mite pilna chang pha lak ah mi a hi. Paul in kraws thu hi Korinth khua ah mite kiang ah a va kikopi chu Grik mite di’n chu thil nuizat um tak a hi. Maleh thu lopi tak a ting pha a hi. Paul chun khawvêl pilna ah kipat chun Pathian a phak pua’i. Mite mutâwm leh etdawng bep a hi, Khrista kraws ah kipat in Pathian a mu zaw a hi. Khrista kraws hi hukdamna lampi a hi.

Grik mite di’n kraws thu hiatthiam a haksat gual in Judate di’n le hiatthiam a haksa kit hi. Amau â di’n dâl na suangpi a hi. Judate ngaidan ah chun thing ah khaikân him him chu Pathian mi têt a hi thei pua’i. Hânsia dawng a hi zaw ngal ah. Messiah chu lopi tak ah hung ding hi ah ngai in, Messiah chungchang a ngaitua sinua leh thina guam a mu khum sekua, Kalvari tâng sang ah le sâng zaw, Olive tâng a lang lian zaw sek a hi. Zia zia chun, Jesu le a mu khial tau a hi.

Paul hin Kraws thu hi a lekthawtna a kawi sângpên sek a hi. Kraws hin thing kipel/ kawkal bep kha a kâwk sak ngai pua, kraws ah kikhêndên lamdang tak mak zia bep le a hi diak pua'i. Pathian in kraws mang ah Khrista ah khawvêl hi ama tawh kicham ah a siam ah, i sukkhialnateu chu sukkhialna ah ngailo in, kichamna a kawlsak thu kha a tângkopi zawk chu a hi. Pathian leh khawvêl kicham kitna chu, zia chu kraws ah Jesu thi zia ah hung um thei bep a hi.

Kraws chu Pathian thilhitheina a hi. Kraws ah Jesu thi zia in Pathian leh mihing kicham in i um theiua, vân leh khawvêl a kicham kit tangâl ah. Mihing leh mihing kikâl ah le kraws hin kichamna ei siam sak thei ta a hi. Mimal

hindân ah kido sekte le ama ah kichamna a hung um thei ta'i. Kraws chu Pathian hepina luandawna mun sângpên a hi. Zia Kalvari lui ah chun Pathian thilhitheina a hung lang a hi.

Jesu taksa mêlpu ah a um lâi khan khatvei chu Jesu'n, "kei lei ah kipat khai kân ah ka um chun, mi zosia ka kiang ah ka hip di," a la tia. Kraws chu Jesu Khrista'n mi zosia a hip theina matchâk, Pathian thilhitheina a hung hi ngêi mai. Paul chun Khrista kraws lo chu suan di dang a neilo thu a gen ah, zia gual ma chun eiu'n le Khrista kraws lo chu suan di dang i neilo di a hi. Kraws pên chu Pathian thilhitheina a hi ngâl ah!

Lalpa'n a thu hing malsawm ta hen. Amen!

Thafam khulsin ka chan masia zia **kraws** chu
kawlwak zing ingka tin, **Lallukhuk** tawh ka then
masia tuzing ing ka.

ATHOKIT TAI

(Matthai 28:7)

~ Rev. C. Lalremruata
Consultant

Tu'hin kin tak in chiau inla, 'Thina kipat a thokit tai'; ti a nungzuite va hil un, la malam un Galili gam lam ah a la chia tai; zia lam ah chun vamu'n lau, zia chu a hi la kiang ua ka gen nawp chu," a la tia.

Jesu nungzui, a zilsakte dinmun kha a phalo ma ma hi. Israel namte â ding ah lal lopi hi ding ah a ginchaku, a namu dindaw thak sak di, gam dang leh nam dangte'n a awpkhumnau ah kipat puidawk ding ah a kineppiu, thil zosia nusia ah a zuu chu Juda nam puitute'n dawilo in, Rome sawlkar thuneina mang in kraws ah thisak a hi tai. Pawl gual ah a um laiua a hotupenu a thi hin, a nungzuite â ding ah chun thil zosia a hung buai-um tai. A zilsakte le ziagual dinmun buai-um tak, lungthim mumal le nei theilo hial in a

um ui. Ziagual dinmun ah a um zinglai un, "Mithi lak ah kipat a thokit tai" ti thu a vak hiatu chu banggual ah lul a hi ta diam.

Mihing ngaituana ah chun a hotupenu hung thokit chun a kinepna gualua hung mala'n, ama thatte leh engbawlte chung ah phuba hung la kit di gual ah ngai thei a hi. Himaleh, kumtuang Pathian thiltup chu mihing â ding ah hiat ziang di gual a hi puai. Musit um tak ah Pathian chapa thina kha, mihing ngaituana musit um tak mun kha, mihing mi hina'n

a ngaitua daw phaklo zawna hung kilatdawna bul a lah hi zing hi.

‘A thokit tai’ ti hechiantute hinkhua kha a niam nalawm lawm e! A zilsakte lak ah pankhak kha le thil zachat-um tak a hi. A puitupenu Peter khan le Thiampu lalpen huangsung ah khan nungakte masang ah Jesu kha vêlthum a kilepsan a hi kha (Mat 26:69-74). A hotu’u thiampu lal leh lekhazikte musit leh dawilo kha a hui a. A chipiteu (Juda) lak ah le lau kawm kawm ah khawsa a hui. Nechêp tak ah hinkhua mang leh lau ma ma in, lungthim ah lauthawng tak kawm ah a um laiun le Jesu ah kinepna nei in a um zing ui. Ziagual mite kiang ah chun ‘A thokit tai’ ti thu hi a hung tung ah, a tak in le ama chu a mu zui ngal kit ui.

Kumtuang Pathian thiltup hi sim ah hiat ziang hi a hipua, mit ah mu ah hiat ziang chi a hi diakpuai. Natna huaise tak thuak ah umte, damdawi in ICU ah um ah dam le kinepna

neilo ah um zinglaite hin mihing hina a hechian tângpi ui; zia chu lei ah hin mikhual leh khualzin mai ka hi ti a kihedawk sek ui (Heb 11:13). Mihing hinkhua a hung chep ah, masang ah sep leh bawl di umte le bawl thei talo ti kihia in mihing hina diktak hi a hedawk sek ui. Ziagual mun ah chun Jesu’n thina zo ah a thawkitna hi chiantak in kilang thei in a.

Thagau thiangtho zâl ah Kumtuang Pathian thiltup gingtute kiang ah thokit hinkhua lopi tak chu hiatsak in a hung um a, haksatna tawpkhawk ah bep hilo in, Jesu ging ding ah kingaitawm ah a kiang ah kituklut hin, zia hinkhua chu gingtute chun a chang sek ui. Naupangte’n lekha a sim ah A AW B a sim laiua chun a phatchuamna a um ziangpuau. Maleh, a hung zil sang zelua, a thiamnau chu nek hawlina a hung mat thei gualua hin, Gingtu chun thawkitna hinkhua chang in a lim ah chun a hiatna a tawm maithei hi, maleh

HINNA VÂK

a hung he tam zel ah, a khanglian deu deu ah, thokit hinkhua chu van ah bep hilo in khawvel ah le mat di a hi ti a hethiam sek hi. Ama ah chun thokit Khrista hinkhua chu um in a hun a mang zaw sek ta a hi. Sawlchak Paul chun, “Nanghaw vang ama zia in Khrista Jesu ah chun la um un; ama chu Pathian kiang ah kipat eiu â ding ah pilna, dikna, sukthianthona leh tatna ah siam a hi,” (1Ko 1:30) ti’n a lah gen hi.

Khrista thawkitna hin gingtute chu Pathian pawl tâklo hinkhua, hinkhua kidak-um ah kipat tho in Khrista hinkhua kikawppi in Pathian pawl kit thei dinmun in a ding kit tai. Eimau ah Khrista hinkhua zawk kha Pathian in ei hona leh ei pawlna a hi ti he thak kit hitiu. Zia hinkhua hi Pathian tawh i kipawlna ding ah bep hilo in, khawvel ah i umdan leh hinkhua puihuaitu ding in ei siamtu’n khawvel a siam lai ah a guandan a hi ti hia in i Khrista

Jesu ah bangkim ngaitua in bawl sek hitiu.

Zia thawkitna hin i thi phâtu leh thina zo in thokit di i hui ti a genchian a, gingtute chun lauthawng lo in thina i maitua thei ta a hi. David chun, “Matheilo in phatna leh ngilneina’n ei zui zing ah, tichun Lalpa In ah kumkhua’n cheng zing ta’ngka,” ti’n hangsan tak ah a gen theina mun kha a hi.

‘A thokit tai’ ti thu zia ah nungzuite chu lim ah a thamuan gualu hin eiun le Khrista thawkitna hi eiu â ding ah lultak a hi ti hechian thak leu hin, i tulai khawvelua hin dettak leh hangsan tak in um thei hitiu in, i malam hun hung um zel ding ah le hangsan tak in maitua thei di i hui. I lei taksa ngei le vuiliam ding ah guanggal di hun a hung tun hun inle kipak tak in i hun neisun hi mang thei hitiu.

Lalpa’n a thu malsawm ta hen. Amen.

GITLO A DING AH KITHAWINA NGAITALO

(Heb. 10:1-29)

*~ Rev. T. Zuanlal
New Lamka (G)*

Bible ah mihingte â ding thucha thupi pen chu soal ngaidamna hi a hi. Thuthunglui hunlai ah soal ngaidamna Bible in ei gen piak thute leh Thuthung Thak soal ngaidamna thu hi Hebrai ziktu hin a la sui det det ah zia chu vak genkhawm hitiu.

1. Khrista thina hi kithawina hing leh lamdang a hi (Heb. 10:1-18)

Zia Bible sung a hin Mosi Dan Lekhabu thupiak dungzui ah gitlo ngaidamna di gan thisan ah kithawina a vel a vel ah a bawl zingu a hi. Ahin Thuthung Thak Jesu'n Kraws ah a thina, kithawina a lat a khan a vel a vel ah bawl ngai kitlo ding in khatvei thu'n Kumtuang â ding in kithawina a lân ta a hi. Chutichun, chawihawi ah

um in Pathian changlam in a hang kichu ta a hi (Heb. 10:12). Jesu thina hi Pathian in a hepina leh a zangaina zal ah Thuthungthak kawt a hawwna chu a hi (Jer. 31:31-43). Migilo â ding ah kithawina a lat chu tatna bukim ahia, Gitlo a ding ah kithawina a ngai kit talo a hi (Heb. 9:28). Ei hawnle Jesu migilote sik ah a thina chu eimau a ding in kipak tak in pawm leu hin Pathian ang in midik hi ding ihu a hi.

HINNA VÂK

2. Khrista thina chun Hukdamna bukim ei piai

Thuthung Lui hun ah thutep thuthung nuai ah Pathian hona kithamna thillat, halmang thillatte, gitlona thillatte, hikhial thillat a lat teu ziaka, a gitloneu, a thiamlo channau ah kipat thiangotho a la hileu chu mawna nei tapuan tiu in, kithawina le a vel vel ah bawl ngailo di a hi (Heb. 10:2). Zia kithawina chu a ngansia theilo zia in, Pathian in a chapa neisun chu Kraws in kithawina hing leh thiangotho in a hun pia, chutichun, Khrista thina chun thianna leh sukthianthona chu kumtuang â ding in a subukim kei ta a hi (Heb. 10:14). Chutichun, Khrista tatna chun gitlo gawtna leh a thilhitheina ah kipat in ei hukdaw a, suk thiantho leh Pathian chawihawina hinkhua chu Thagau Thiangotho hiatpitu hi a hi (Heb. 10:15).

Chutichun, Khrista tatna chu hukdamna bukim kei a hi'n, gitlo â ding ah kilatna a ngai talo a hi. Halleluijah.

3. Khrista chu Thiampu lianpen a hi

Khrista chu eiu â ding in Thiampu chungnungpen ahia, eihaw gingtute hi Pathian insung mite ihui a hi (Heb. 10:21; 3:2). Ziagual lawm ah chanpha i chan ziaqua hin lungthim diktak pu'n Pathian nai hitiu (Heb. 10:22). Chuleh kilinglo hial in i kinepnau thugin hi tudet zing hitiu (Ch. 23), zialo ah chun hepina leh nasep pha sêm ding in kitilhattua hitiu (ch. 24,25). Zia gual ah chan vangpha hi dan nuai ah umte sang in i mawpuaknau a sangzaw a hi. Thiampu chungnungpen i nei ua, Pathian insung mite chun ginna, kinepna leh hepina taklat chu i sep diu thupipen a hi.

Ahinla, mi'n thutak
hiatna bukim a nei nung
ua, thil a hikhial tei tei a
hi chun Khrista thina chu
bangma a phatchuampi
pua, a lawkpi pua, zia
malak ah gitlo a ding in
kithawina umkit talo di
a hi (ch. 29). Vaihawmna
lau um tak leh a dote kâng
di lungnatna mei chu um
zaw ta di a hi (Heb. 10:27)

Zia zia chun simtu
dawitak, tuhin Khrista i
hukdampa leh genpiaktu
ding ah a um zinglai a hin
lunggil zosian Ama nai in, a
dawigual hi ding in a kiang
in chia hitiu. Lalpa ka hung
hi nang bêl ding in ti in kilân
hitu! Tu ma ma hin bawl mai
in, Lalpa'n simtu zosia â ding
in malzawl ta hen.

SABILTUNG PANI HOLIMNA

Sabiltung 1na:

*“Lawipa, zani Jerusalem ah khawpi sung ah khan mite’n
ka chiana di lampi ah puante leh tumbâkte pha ah kiko in
chawihawina tawh ei la lamtua ua, tuhin la kuama’n ei
hepha kit ta puau ah, lim le ei limsak tapuau ah, bangti le
a hi diam?”*

Sabiltung 2na:

*“Lawipa zani la chung ah chuang kha Jesu a hi, Jesu la
chung ah a um zia mai ah tia kha chawihawina tawh
lamtua ah um la hi, tuhi la chung ah Jesu um talo chu
sabiltung dang tawh kibang la hi tai.”*

~ Anonymous

JESU BARABBA A HEM A HILO LEH, JESU MESSIAH? (Matthai 27:15-23)

~ Rev. H. Lamthianmuan
i/c Dumlian Pastor Bial

Thumapui: Gingtu hinkhua chawkbwaitu leh a Lalgam nasepna ah nawngkai ma ma chu; Dawitelna, Pathian in mihing khut ah a kawi hi a hi. Thagau pui ah um te â ding ah chun dawitel ngaitalo in, thiamchanna thuthung têlsa chu zui mai di a hi. Ahi'n, Thagau puina dawnglo te'n vang khawvel ah hin dawitel di a tam khawp mai hi. Zia zia chun, Barabba a h'em Jesu zawk telna ding ah hin, i dawiu têt thei di chi i hui em (Thuneina i neiu em?) Bang dinmun in i ding em? Thagau pui in i um nau em, a hiloleh nang thagau la kipui guat a h'em? ti chawmchan vak thîl khawm hitiu.

1. Dawitel thei ding ah siam i hinau hi a huntawk diam?

Pathian in mihing khut ah dawitêl theina ei pia a hi. Gingtu hinkhua ah dawitelna hi'n Jesu zawk i changtel zia ah pianthak ziang thei ei diam? A hiloleh, Jesu i têt zia ua hukdamna chang ziang ta in i kingaiu em?

1) Dawitêlna mang ah Jesu kitêl pianthak ziang thei i tiu chun, Kochuam a hin mun a um puai. Revival, Crusade, Camping leh Retreat-te ngailo di a hi. Inmun ah kipat hin kitêl piangthak ziang leu hin hun mai di hilo a h'em. Jesu thiam channa kalbi zuilo in i têtthaw ziang sek zia

ah hin mimal hinkhua
sual simna tak tak a um
pua, Insung i chawkbuai
ah, khawtâng in buaina
i tun sak ah, Kochuam
inle a thawk khawlaw
sek a hi. Zia gual
dawitêlna ziak ah chun,
i Khristian hinkhua
khawlo in i siam ua,
Pathian lopina leh
chawihawina i chansak
seklou a hi.

- 2) Jesu dawitêlna di ahin
i piangthak masaku a
ngai hi. Piangthaklo in
Pathian na hi a sep tak
tak thei puai. Pathian in
dawitêlna ei siampiak
hi ama i gin nung ah
a thu zawm ding ah
i kipiak daw nung ah
kipat chun dawitêlna
chu i siam pan bep thei
ui. Jesu dawitêlna bep
hilo ah a nei ah neithaw
leh Lalpa thu mang ah
kingazo hinkhua a ngai
hi. Pathian gingdettu hi
ding a hi'n Lalpa thupiak
zawmtu a hi di a hi.

Pathian in kithawina
sang in thumatna a daw
zawi; chutilo chun nangma
phatchuam ngaina ziak in,
piangthaklo in dawitêlna
mangfu la kisa maithei.
Ahin, Thumanglo la hi chun,
thilpha bawl in kingai kin,
***“Thumanglo thilpha bawl a
um ngai puai.”*** Jesu'n bawn,
“Abba, Hepa, Nang â ding in
thil bangkim hithei ahi'n, a
thei chun, zia no hin ei pelmai
hen ti'n a pauchap ngut ngut
hi. Himaleh, keima thu hilo
in, nangma thu thu hi zaw
hen a ti a hi kha.

2. Dawitêl di chu Jesu a h'em Barabba

I dawitêl di chu Jesu a
h'em Barabba, kua zawk
i dawitêl ding a hi em?
A dinmun tamlo cha vak
sutkit hitiu.

- 1) Jesu Barabba kiti hi:
Jesu = Hebrai te pau
ah Yashua/Joshua
tina ahi'n, Lalpa chu
Hukdamtu ti'n i letdawk

HINNA VÂK

thei hi. Barabba =
Hebrai te pau ah Bar hi
Chapa tina a hi. Abba
ti hi Hepa tina a hi. Zia
umzia chu Apa chapa
tina a hi.

A dinmun - Chanchinpha
buli te'n a chanchin a
gentamlo khawpmai hi.
A kihiatdan ah chun, mi
suammang, mi tualthat,
mi gucha mai mai le hilo
Rom Sawlkar ah kipat
helna siam ah pawlpi
dintu ahia, gitlona
huaisia tak a nei zia ah
damsung suangkul tâng
ding ah Rom sawlkar in
a thutan khum a hi.

- 2) Jesu Messiah kiti
hi: Hebrai te pau
ah Yashua/Joshua
tina ahi'n, Lalpa chu
Hukdamtu ti'n i letdawk
thei hi. Messiah umzia
chu = Pathian sathau
nu, Pathian guatchuam,
sepding bîk nei ah
sathau nu tina a hi.

A dinmun - Juda mite a
ding ah sakhua mi tak,

Puitu, ziltiltu, hotu leh
sudamtu a hi. Pathian
thiltup supiting ding in
mitamtak gindan a siam
pha a hi.

Pilat in dawitêlna a siam hi

Jesu leh Barabba chu Pilat
vaihawmna mai ah a ding gel
ua, Juda Vaihawmtute, Upate
leh mipi tamtak ma ang ah
chun, zia tegel hinna hi ka
khut ah um a hi'n, a hinnau ka
thadawk thei in, Kraws ah ka
khenden thei hi ti'n a genta
mai hi. Pilat in kua pen hun
thadaw piak ding ka hem?
ti'n a dawng ta, thumvei hial
a dawng ah, mipi te chun,
Barabba zawk a têl tau hi.

*Pilat in dawitêlna a mat khial
pawi mama chu:*

- i) Jesu a kimaituapi ah,
himaleh kisiam phat na'n
leh piangthak na'n a mang
puai.
- ii) Jesu chung ah mawna
bangma a mu pua'n,
himaleh Jerusalem
temple ah sia (tax) a lak
ziak in vaihawmna dik a
dinpi ngam puai.

- iii) Juda mipite mitthîpna
ziak ah ama chu a matu ti
a hengal ah, himaleh Jesu
thutak zia maituapi sang
ah Kaisar (Gam pumpi
vaihawmtu) maitua di chu
a lau zia in Thutak chu a
nawlta a hi.
- iv) A zi'n le zia midik chung
a hin bangma hi ki'n ti'n
a dawn ah, himaleh,
thisan sua mi a hi zia
in a lemchanna tui in a
khut silthiang gua maleh
a gitlona a sawpthiang zo
talo a hi.

Pilat in Jesu a khetden sak
tho tho zia a khan, a chung
ah thil tizat um tak a hung
tung ta a hi. Thisia a thi, a
pianna gam Rom khawpi tung
kit manlo in mualpho tak in
ama leh ama a kithat hi, ti'n
a chanchin suitu ten a gen ui.

Barabba teltu te hinkhua
chu, a lawklo khawpmai hi. A
hinkhua uh nuam leh bit in a
mang pua, suammang a hui
ah, gucha a hui ah, tualthat leh
gitlona tin cheng Barabba nun
chu a nei zing ziangu a hi.

3. Nang in Jesu la tel diam, thil dang zawk?

Tuni hun ahin Pathian
in dawitel theina ei piak hi
lultak a hi. Nangma dawitelna
ziak ah Lalpa sumualpho tu
la hi em kienchian in; Lalpa
dawizawng he ngal ah bawl
peilo, zui peilo ah a nasep
phatsan la hi chun, piangthak
kahi i ti thei diam?

Mi piangthak chun - A nunlui
hinkhua nusia ah nunthak leh
hinthak ah hinkhua mangtu a
hi ding a hi. Pathian in hun
chiasa te thangai ding in ei
siamlo a hi.

Pathian gingdettu chun -
Ama dawigual ah kingalo ah,
Pathian chu ama chung ah
thuneitu, Pathian ah kinga
zingtu leh taksang tu a hi ding
a hi.

Lalpa thupiak zawmtu chun
- Lalpa sumualpho phallo,
Lalpa melsiatna ding ah
nasem utlo, Lalpa a ding ah
thilpha hiding ah hukdam a
hi kihechian mi a hi ding a hi.

HINNA VÂK

Tuni hun a hin Juda mipite leh Pilat gual ah Barabba i dawitel zawk naklai ding a hi chun, zia khang leh khawvel hun um kit â ding a hin, chan leh mun him him i nei puau ti hiai tiu. Ahin, Jesu teltute vang tu dinmun in haksa ma leh tu khang leh khawvel hung umkit a ding ah chun chan leh mun nei zing ding a hi.

Thukhakna: Jesu teltute chun a dinmun a lua ngai ah, ama gual ah sakhua mi diktak a hi ngai hi. Kochuam te lamdik ah puitu, a chanchinpha thutak ah ziltitu, amau ah Jesu mel kilatna ding in thilpha bawltu, a selai siamphatu leh sudamtu a hizel ding a hi. Mi piangthakte chun Jesu a tel

ah tel thaw bep hilo in a nun hile a kilak thei ua, a neitheiu a hi. Mi piangthak nailo ten vang zia nun chu a dawitua, a tel ua, ahin a neitheidiaklou a hi. A ziak chu, thutak gen piaktu Thagau thiangtho a dawitua ah a nawl ua, vaihawmna dik a ngaina puau ah, Pathian thutak chu a kipui sak nawplo ziak un, leh amau dawitela a kipui sak ziak un a dawitela chu mangkhial in Lalpa lopina a chang zo talou a hi. Thagau thiangtho pui nalo ah chun Jesu nun nei ding gual a hi pua, Pa (Pathian) kiang tuna ding in Jesu nei a ngai kit ah, chutilo chun kuaman Pa a mu thei puau hi.

La makhua ding gêl chian theilo ah, lungkham leh lungthim buai takah la um phatleh a nung la zui, la masang ah a la chia masa Pa kha en in, Ama'n nang â dingah lemkuatna fel tak guatsa a nei sek hi"

~ Brittany Moses

REVIVAL MEET - 2025 DETAIL PROGRAMME

A mun : Hill-Town Kochuam Biak-In
A hun : Ni 23-25 May 2025
Thupi : “Hung tho dawkin” (Isai 52:1)
Speaker : Rev. C. Lalremruata, Consultant

23.05.2025 (Simhaini) | 07:00 p.m.

Puitu : Rev. Vanlalchhuanga,
Moderator
Lapawl : 1. Synod Choir
2. Lamka P/B Lapawl
3. D. Phailian P/B Lapawl
Thugentu : Rev. K. Neihzial,
Executive Secretary

24.05.2025 (Kiginni) | 11:00 a.m.

Puitu : Upa Tinliankham,
Finance Officer
Lapawl : 1. Synod Choir
2. S. Kawtlian P/B Lapawl
Thugentu : Rev. C. Lalremruata,
Consultant

24.05.2025 (Kiginni) | 07:00 p.m.

Puitu : Rev. Andrew LR Khiangte,
Synod Secretary (Sr.)
Lapawl : 1. Synod Choir
2. Mata P/B Lapawl
Thugentu : Rev. C. Lalremruata,
Consultant

25.05.2025 (Pathianni) | 11:00 a.m.

Puitu : Rev. Thianguinlim Vaiphei,
Statistician
Thilpiak lakkhawmna : Synod â di
Lapawl : 1. Synod Choir
2. Panglian P/B Lapawl
Thugentu : Rev. C. Lalremruata,
Consultant

25.05.2025 (Pathianni) | 01:30 p.m.

Puitu : Rev. Summinlian Vaiphei,
Synod Secretary (Jr.)
Lapawl : 1. Synod Choir
2. New Lamka P/B Lapawl
3. S. Munnuam P/B Lapawl
Thugentu : Rev. C. Lalremruata,
Consultant

25.05.2025 (Pathianni) | 07:00 p.m.

Puitu : Rev. K. Neihzial,
Executive Secretary
Thilpiak lakkhawmna : Zintuntu
Kochuam â di
Lapawl : 1. Synod Choir
2. Hill-Town Kochuam Lapawl
Thugentu : Rev. Vanlalchhuanga,
Moderator

KNP HUANG

KNP KIKHAWMPI LIAN 14 VEINA REPORT

A mun : Lingsiphai Kochuam Biak-In

A hun : 28th February - 2nd March, 2025

Thupi : "Puakgik kidawntua hitiu" (Galatia 6:2)

Rev. Vanlalchhuanga, Synod Moderator, TPC ah kipat in Thagaulam thupi *"Puakgik kidawntua hitiu"* ti ngaithâk a hi. Kikhawmpi hun sung in Rev. Andrew LR Khiangte *i/c Mata Pastor Bial*, Pu Kamzathang, *Revival Speaker*, Pi Nemngaihchin, *Assistant Professor Churachandpur College* te ah kipat in Pathian thu ngaithâk a hi. Valedictory Sermon Pi Lhingkhovah, *CKNP Chairman* ah kipat ngaithak a hi.

Seminar: Pu Khailalpiak, *Assistant Professor Moreh College* ah kipat in *"Mo vanken chungchang"* ti thupi kichian tak leh fel tak in ngaithak a hi. Sister Synod pani - Manipur Synod PWF leh Zou Presbyterian Synod PWF ah kipat palai pani gel hung pang in, amaute ah kipat in greetings ngaithak a hi.

Vâihawmna: 1st March, 2025 (Kiginni) sôn in Vaihawmna Mata Vengpi Kochuam Biak-In ah nei a hi'n palai (CKKP pani leh Sîmtu tawh kigawm in) 168 chiakhawm a hi. Lalpa gamletna ding ah kiguanggal thupukna kilate chu:

1. Synod Office ah Office Assistant *i/c* KNP um thei didan ngaitua di
2. KNP kikaihuaina dân, pauchap pawimawdan, khristian hindân kilawm (Etiquette and manner) thupi mang ah seminar nei di
3. CKNP Committee in Bialtin fan di
4. 2025-2026 ah Budget (Muna leh Matna) chêng 3,64,000 ding ah pawm a hi.

2024 sung ah KNP te dinmun:

Numei zosia zat : 9049

Numei dân zokim zat : 6521

KNP Member tamnapen : New Lanka Bial - 843

April 2025

Member tawmnapen : Phaipheng - 87
Sêmtu chawm zat : Bial - 7 (chawp zat - 9)
CKNP - 2
Numei Pathian thuzil zat : 6

2024 sung ah Khristian Sungkuan dinmun têna:

1. Nisin Insung kikhawpna neithez zat : In 800 (22.67%)
2. Anchangham hamthez zat : In 3151 (90.08%)

2025 - 2027 sung ah CKNP puitu dite:

Office Bearers

Chairman : Pi Kh. Thianniang, *Lamka Bial*
Vice Chairman : Pi Veithiannei, *Mata Bial*
General Secretary : Pi Neikhovak, *S. Kawtlian Bial*
Assistant Secretary : Pi Manneimuan, *S. Munnuam Bial*
Treasurer : Pi Niangthianting, *Lamka Bial*
Finance Secretary : Pi Lhingthianvak, *D. Phailian Bial*

Committee Members

- | | |
|-----------------------|-------------------|
| 1. Pi N. Hoinu | D. Phailian Bial |
| 2. Pi Chinngaikim | Mata Bial |
| 3. Pi Chongneu | New Lamka Bial |
| 4. Pi Dimtinniang | New Lamka Bial |
| 5. Pi Rody Lamneiphah | S. Munnuam Bial |
| 6. Pi Niangneilhing | Lamka Bial |
| 7. Pi Bemshi | S. Kawtlian Bial |
| 8. Pi Nemhoiphah | S. Kawtlian Bial |
| 9. Pi Phalhawiniang | Kangvai Bial |
| 10. Pi Niangdoiting | Kangvai Bial |
| 11. Pi Ngaiemmoi | Gangpimual Bial |
| 12. Pi Kimthianchoi | Gangpimual Bial |
| 13. Pi Deikholam | Sugnu Bial |
| 14. Pi Holkanh | Sugnu Bial |
| 15. Pi Hoilemkim | Kawlhen Bial |
| 16. Pi Chongmoi | Kawlhen Bial |
| 17. Pi Niangsawnnei | Phailianbung Bial |
| 18. Pi Lamsangkim | Phailianbung Bial |

KKP HUANG
CENTRAL KHRISTIAN KHANGLAI PAWL
Bial Report Khaikhawmna

1. Kisimna

Sl. No.	Kisimna	2023 - 2024	2024 - 2025	Punna (+) Kiamna (-)
1	Branch umzat	83	86	+3
2	KKP Member zat			
	Numei	1919	2231	+ 312
	Pawsal	2595	2971	+ 376
	Gawpkhawm	4514	5202	+ 688
3	Zi/Pawsal nei zat			
	Biak In hawng ah	33	67	+ 34
	Mundang ah	91	88	- 3
4	Thunun ah umlai zat	84	79	- 5
5	Mithi (KKP lak ah)	13	8	- 5
6	Bible zillai zat	19	15	- 4

2. Bial KKP nasepna(activities) tângpi

Blood Donation camp nei thei zing, Branch vethâkna, Bial KKP dang ve, Kipawlkhawmna/Fellowship, Semtu chawpna chiapi zing thei, Pauchapkhawmna/Anngawl Pauchap, Bible Quiz, Solfa Training, Seminar, Biak-In hawng ah kichenna neite kipakpina thilpiak, Pastor kichawn ding te thâkna thilpiak piakte, Bible châng signboard tâkdaw, Pastor Quarters’ a di van pawimaw chawk, Meet, Advent/Advance Christmas, Cleanliness drive te hi Bial KKP nasepna tângpi a hi.

3. Kumpuan[2024-2025] “Gam chu Lalpa-a a hi” bawzui dan
Kumpuan Thupi, “Gam chu Lalpa-a a hi” ti hi KKP kikhawpna hun in zil sek a hi. Bial sung ah Branch tamzaw te’n kitûp leh lawktak in zilsuak thei hi. Maleh, gambuai in a sukkhak Bial khenkhat la theilo a um u’i.

4. KKP Day(21st January) matdan tângpi

Bial sung ah branch te hin, mani branch lemchang dan chiat in matzawk a hi. Sports, Blood Donation, Cleanliness Drive, Kikhawpna ate leh Thawlawm kuan te in KKP Day mat ahi'a, Bial huap/branch ah mang theilo hunkhawp aki um nalai hi.

5. Bial KKP sum mudan tângpi

Branch tin in a tuak ding zat Budget siampiak apat te, Conference thawmlawm, Bial huap Programme thawlawm, Bial Standing leh Bial KNP apat te, Fund drive, thaphût, van khel man apat te hi sum muna te a hi. Chun, CKKP Budget Bial zosia in aki pesuak thei a, kipakum akisa'i.

6. KKP Kikhawp dan tângpi

Branch khenkhat in Programme Making/Drafting Committee neithe i in KKP kikhawpna Programme siam sek a hi. Group Night, Kumpuan thuzilna, Sermon, Topical Sermon, Fellowship, Cultural Night, Competition kikhawp, Lazilna leh KKP Hand Book in ei ziltîl kikhawp dan te mangcha in kikhawpna programme te guanggal thei le a um u'i. Gam Buai zia ah a sukkhak Branch te leh Tanggam lam Branch khenkhat kikhawpna neitheilo a ki um a, khawk akisa'i. Delhi Branch in thakhat a Kiginni masape'n bep in KKP kikhawpna a nei a, Bangalore Branch in, In ate kichawn vel in thakhat ah khatvei kikhawpna a nei thei hi.

7. Report ding ah pawimaw dang

- a) Bial Lapawl Lyrics video bawl thei aki um hi.
- b) Bial Standing tawh kithua in Bial Lapawl te mat ding Bluetooth Speaker chaw thei aki um hi.
- c) Pastor Quarters' chawkna ding piathei aki um a, thilpha a hi.
- d) Frontline vethâkna nei thei Bial a um hi.
- e) YVA Relief Camp vethâkna nei thei a um hi.
- f) KKP member tawm zia in haksatna tuak um hiat ahi'a, da um akisa'i.

HINNA VÂK

g) “KKP Member of the Year” chawihawina siamthei a um hi.

Gam buai ziak bep hilo in, Khanglai te kithadana liantak mu ahi’a, panla thak a, Pathian Lalgam nasepna kalsuan thak kit ding in iki chial a hi.

KKP VAIHAWM KIKHAWP 8-VEINA NUNGTHILNA

1. Vaihawm kikhawp 8-veina zintuntu panglian khua hi, khua nuamtak, Khua mipite kituak mama khua hi in mu leh hiat thei a hi.
2. Kochuam mipite khawhiatna leh lemhiatna jal in, IDP ah khua hung bêlte chu kochuamte’n mang phachuam in chuleh a neitu hina chanvo le a chansak theiu hi, a lopi ah, ettawntak a hui.
3. Panglian Bial in, a zintun dan, et tawn tak kasak mama chu - programme siam dan tawh et in kikhiatna tamtak mu in a um hi. Programme suadow hun ah, a thîltute et in giksak ding gual ah ngaitua himaleh a zintuntu hin jângkhai tak in a zintun theiu hi a hi. Mipi chiakhawm dan tawh amau kisak dan et in hawm le hawmthaw phial dingun gingchat a um hi.
4. Photo Booth hile a kilawm ma ma hi. Lungthim leh ngaituana a seng ui ti kilatna chu a chiakhawm palaite’n a lawp khawp maiui. Comments le a hawi thei hi. Low Budget but Elegant himai.
5. Fellowship Hall stage leh design hi a hun tawh chet hi. A etlawm ma ma hi. Fellowship programme tawh a kituak khawp mai hi. Programme le a jangkhai thei dipen chuleh hall arranged leh design hi a kimil khawp mai hi.
6. Giakna leh Kisukthianna kitup tak vak mu in, lungdam a um hi. Home Away from Home a hi ziang hi.
7. Department counter kisiamte a kitup in, a kiningting ah, chuleh counter tin ah mawpuakna

- neitute a felua, a ho nawp thei ma maui.
8. Nêk leh dawn lam nana na chu, khawpi ah zintunte tawh kikhiatna talua a um puai. Kikhawp pel sin ah nek leh dawn ah kipawh khawmna hin, khawmpi a sunuam chuam ma ma hi.
 9. USHERS te a felua, a smart ui. A ho nawpua, a Strict-ui. Dress le a kitup hi.
 10. Tuanvaite hi pakchatlo theilo a hui. Insung nasep tamtak leh cha leh nau taisein, zingkal matak ah Breakfast, lunch, snacks leh dinner di a buapiu hi, lopi kasai. A kithutuakui. A hopi nawpua, fel le a felui. A tui bep hilo in, a changkang khawp mai hi. (Abik ah Antui don thei ngal di ti in, packing sa a kawi seku kha a hawi taluai)
 11. Traffic lamte a kitupui. Gari kawi sak dan a fel hi. Highwaylampi tai lumlette subuai keilo ding in duty a bawlua chuleh gari arrange dan le khuasung subuai keilo in a nawksak puai.
 12. Water Supply department- te a felui. Water supply department a um hi ka hiat patna a hia, a kilawm khawp mai hi.
 13. Badge and Banner colour combination la thiamui. Lungdam a um ah, Badge belte ding in, ki-at a um hi.
 14. Light and Sound hi chudthusam ting zo chetlo hilehle theitawp sua ah kila a hi ti muthei a hi.
 15. Khua hausapu tawh Kochuamte la kithutuakui ti mit a mu in, lungdam a um hi. Chiato jel ding a dawisak a hi.
 16. IDP tawh Khawsung ah a lah um masate kidaidanna a um pua, kipak a um hi. La lungthimu changkang kasai. Changkang kiti chu Lungput/lunggel kha a hi ti hi, mu thei in a um hi.
 17. Kochuam committee, Organising Committee, KNP leh KKP te hi, sep peilo, bawl theilo lanei puau ah, chuleh mi thada Bial la hi puau ti hiat thei a hi. Lungdam a um hi.

HINNA VÂK

18. Pawimaw kasakpen
pen - Palai hungkhawm
zosiata hi jângkhai deu
ah, lei zintun theiu hi,
Panglian Bial te Top-Secret
hi'na. La kiziltinau leh la
kithumawpu a hawi tuak
hi. Lungdam a um hi.

MASAWNNA DI NEUCHA KAMUTE -

Budget siam dan dungzui
ah tawi lahiu a. Tight tak ah
zintun hi di la hui a. Pilvang tak
ah tawi lahiu ah kipak a um hi.

1. Photo booth hi a hawi ah,
mipi in a enla ah, kikhawp
kipatma first bell git ah
kipat in, Photo booth light
off bawl a phai. Mipi lasak
lai ah, lim kila tam zia
in, kikhawpna a subuai
hi. Light off-lo tâk in le,
Duty di bêk a la umleu
duthusam a hi.

2. Sound System a nawp leh
kikhawmpi lawting hisek a
hi zia in, outdated talua
sound hi Rental/khello
di a hi. Budget lam in
ngaituana a um hi, hilehle
zia chu suanlam a ting
chet puai.

3. Lights hi chu theitawp

sua lahiu ah, kapak chai.
A hinlah, vak chu a vak
singseng zo tak tak puai.

4. Biak In luttana vel haw
kha, Low Budget in a lah
kichei thei henla, neucha
a luttana step bul vel
kha, welcome Banner or
step bek kha rong thak
nu a hem or decoration
neucha um leh etlawm ina
ti duthusam a hi.

5. Khanglai kilawikhawm
lasak khawmna ding
in, Biak In sung khuang
kha upgrade thei a lah
hileh chu, lasak sunuam
in tin, zintuntu â ding in
le thil phachuam hi'na.
khuangthak nei hi ziang di.

Khawmpi zintuntu ah pan
hi, i neisateu a luite siamphat
theina hun lemchang leh a
hawilo le siamphatna hun
lemchang ah lak ah mat
phatchuam hi masawnna khat
a hi.

Thil kigen zosia hi, Bial leh
Kochuam suk mualphona lam
ah kigen hizawlo in, kathîl dan
leh kamu dan leh ka dawisak
dan ka taklat thu ah ngai thei
leu hin kipak um ina.



Sunna

UPA GINKHANPAU (KUM 64)



Upa Ginkhanpau hi (L) Pu Haukhai leh (L) Pi Hauting te gil ah ga gochan pathumte lak ah a upa pen a hi. April ni 10, 1961 kum in S. Bualjang khua'n a piang in, 2004 kum in Nu Chinthianhoi tawh Biak-In hawng in Rev. T. Ngama in S. Bualjang Kochuam Biakin in a la kichen sak in, chapa pathum leh chanu pani a nei ui. Mi gunchu tak leh mi kukal tak ahin, zilna lam in M.Ed. tiang a la zil zo hi.

Nasepna Lam

Ama hi 1991 kum in Government Teacher (Ad hoc) in a la sem pan in, 1993 kum in regularised a hung hi. Ginum tak ah government nâ sem zing in December 2024 chun DI in promotion a la mu'n, March ni 1, 2025 in a la pension hi.

Ama hi khawtâng leh kochuam ah mi kimang tak ahin, 2020 kum in New Lamka Presbyterian Kochuam ah Tual Upa ding ah têldaw ahin, October ni 8 2023 in Lamka South Presbytery Kikhawmpi, S. Munnuam Biakin ah Rev. Thangneipau khut in Upa Ordination a la chang hi. 2023 kum in New Lamka Kochuam ah Gamthak Committee Chairman leh Kochuam ah Assistant Secretary in a la sem in, 2024 kum in Kochuam Secretary nâ a sem hi.

HINNA VÂK

A Hun Nunung Lam

Hun sawt tak diabetes leh BP nei ah ki-enkawl zing a hi lai in, March 2024 a khan a luchang lam ah Cancer natna nei a hi hetdaw a hia, Delhi lam ah kikaikawl in Chemotherapy leh Radiotherapy course khat zo in October ni 4, 2024 in a hung kile kit hi. Inmun ah a ki-etkawl zing lai in February ni 24, 2025 zingkal in Bathroom ah luhai in a kipuk ah, Hospital zawtpi ngal himaleh a lugu a takek ziak in a gu them a lusung lam a lut a, khua helo leh ho theilo in a um den ta a hi. Churachandpur District Hospital ICU ah etkawl a hi zing lai in March ni 5, 2025 nilaini zingkal lam dak 9:10 in a Insung mite leh a kochuamte nusia in a kumtuang gam ding eila zawt san tai.

Vuiliamna

March ni 5, 2025 sunnung dak 2:00 in a chenna mun Bethel Area, Dorcas Veng in New Lamka Kochuam intekna in Bialtu Pastor Rev. Thanglianlal in a vuiliamna hun a mang hi. Biakin lam in Lamka South Presbytery Moderator Rev. Thianganlim in hun a mang ah, New Lamka Kochuam Lapawlten ama thakna'n lâ a sau hi. Thanmual in Rev. Thanglianlal in hun mang in, Insung mite leh a kochuamten ît tak leh thalêl tak in vuiliamna a hi.

*Report petu
Upa Genlalsan
Secretary
New Lamka Kochuam*

LEKHALÊNG KUA'N A LÊNSAK?

“Kei,” ti’n mawlkang chun a tia. *“Kei”* ti’n lekhapuan chun a ti kit ah, *“Kei”* ti’n naupangpa chun a tia. *“Hilo e, kei ka hi,”* ti’n hui chun a ti kit hi. A diktak in a lengua kigawm ah lekhaleng chu a lênsaku a hi. Mawlkangte chu bawng henla, a mei chu thingbâk in kitang henla, lekha chu kekzak henla, a hiloleh hui chu hânglo taleh lekhalêng chu hung ketha kit ziang di a hi. A mal mal in panna chuam chiat a nei ui. A kimatna chiatu chu nênzul thei di a hi puai. Mimal tinte’n sepdi i nei chiatui. Pathian nasepna hi lawting ding ah i dawî chun, mimal tinte’n i mawpuakna chiat sep mualsua a pawimaw hi. Sep di zatchuam chuam damlo ngaisak leh kanthak, thilpiak ah, thugen ah, a dang dang i nisin hinkhua ah Pathian na i sepna ah sephawm ah pankhawm a pawimaw hi. A Kochuam Pathian nasep sukpitinna ding ah chun i panmun chiat ah ginum tak ah pan ah sephawm a pawimaw hi. Taksa khawsakna ah le ziagual chu a hi tho hi. Kithuakhawm, pankhawm, sephawm hin taksa leh Thagau ah hinkhua sukkhak lianpi nei ngei in a.

Keima’n ka phu ah, Apollo in tui a buak ah, Pathian in a khansak a hi.

A phutpa chu bangma a hi pua’n, a tui buakpa chule bangma a hi diak puai; Pathian bep in a khansak thei a hi ngal a.

A phupa leh a tui buak pa chun a tup uh kibang a hi; mitin in ama sepgim ga chu, a sep dungzui un kimu chiat ding ahîu.

Keiu chu Pathian naseppi, a suakte ka hîu in, nangu chu Pathian loma leh Pathian In chu la hîu hi (1Ko 3:6-9).